

Home Sec. Visit Concludes

केन्द्री गृह सचिव गोविंद मोहन हुंदा जम्मू-कश्मीर दा दंडु दिनें दा दौरा सम्पन्न होई गया ऐ। इस दरान उनें प्रदेश च सुरक्षा ते विकास मामलें बारे उच्ची सतह दियां केई बैठकां लाइयां। अपने दौरे दे दुए ध्याड़े उनें जम्मू च लैफ्टिनेंट गवर्नर मनोज सिन्हा हुंदे नै मलाटी करिये प्रदेश च बने दे पूरे-पराते सुरक्षा हालात ते जारी आतंकवाद-रोधी अभियानें दा जायजा लैता-गृह सचिव होरे बक्ख-बक्ख बैठके दरान प्रदेश दे पहाड़ी इलाके च बधाई गेदी सुरक्षा दा आंकलन कीता ते पिच्छले दिनें अंतराश्ट्रीय बन्ने ते कब्जा रेखा पर पाकिस्तानी ड्रोन दिये घुसपैठे आले मामले दी बी समीक्षा कीती। गृह सचिव होरे आतंकवाद-रोधी अभियाने गी असरदार ढंगे नै तोढ़ चाढ़ने ते खिते च पूरी-पराती सुरक्षा स्थिति बरकरार रक्खने लेई सुरक्षा एजेसिये बश्कार तगड़े तालमेल दी जरुरतै पर जोर पाया।

<><><><><><><>

JK Govt. Iran

मुख्यमंत्री उमर अब्दुल्ला होरे आखेया ऐ जे सरकार इस्सलै ईरान च विद्यार्थिये सनें जम्मू-कश्मीर दे रौहने आहले दी सुरक्षा ते भलाई-बेहतरी पर पूरी चाल्ती निगरानी करा रदी ऐ। उनें आखेया ऐ जे प्रशासन नै दस्तावेजीकरण- सलाह ते भलाई-बेहतरी सरबन्धी समर्थन लेई विदेश मंत्रालय ते ईरान च भारतीय दूतावास कन्ने तालमेल बनाने लेई नमीं दिल्ली च अतिरिक्त निवासी कमीशनर गी नोडल अफसर दे तौरा पर नामजद कीता ऐ। मुख्यमंत्री होरे परोआर आहले गी आखेया ऐ जे ओह घबरान नैई ते CM Help Line 1800-8900-166/ Hello J&K 7303-

620-090 ते कंट्रोल रुम 011-246-111-08/ 011-246-112-10 ते 0194-250-1955 पर सम्पर्क करन।

<><><><><><>

Maha –Guj Tourism

जम्मू-कश्मीर सैलसफा मैहकमे नै 2026 दे स्यालै दे सैलसफा दी रुतै गी बढ़ावा देने लेई मुम्बई च Maharashtra and Gujrat Fraternity Outreach प्रोग्राम दा आयोजन कीता। किट्ठ गी सम्बोधित करदे होई मुखमंत्री उमर अब्दुल्ला होरें सैलसफा सरबंधें गी मजबूत करने ते इनें मुख बजारें थमां ट्रेवल एजेंटें, Tour Operatorएं ते मीडिया गी सीधे तौरा पर शामिल करने लेई सरकार दे धैइये पर लौस पाई।

<><><><><><>

Dar Shivraj Meet

राई-बाई मंत्री जावेद अहमद डार होरें नमीं दिल्ली च केन्द्रीय कृषि ते करसान कल्याण मंत्री शिवराज सिंह चौहान हुंदे कन्नै गल्लबात करदे होई केन्द्रीय क्षेत्र च खेतीबाड़ी ते ग्रामीण विकास लेई केन्द्रीय समर्थन च बाद्दा करने दी मंग कीती। डार होरें राष्ट्रीय कृषि विकास योजना ते Krishonnati योजना तैहत बकाया पेदे फंडस गी तौले जारी करने दी विनती कीती ऐ। उनें हाल च गै सम्पन्न होए दे भारत -न्यूजीलैंड मुक्त बपार समझौते बारे सेऊ उत्पादकें दी चेंता बी जताई- जेदे कन्नै घरेलू बजारें पर एदा संभावित असर पेई सकदा ऐ। केन्द्रीय मंत्री होरें इस

गल्लै दा भरोसा दिता जे मुकामी करसानें दे हित भारत सरकार दी सब्बनै थमां मती तरजीह आहले बने रौहगंन।

<><><><><><>

R'Day Prep (Byte)

गणतंत्र दिवस आले समारोहें कोला पैहले जम्मू-श्रीनगर राश्ट्री जरनैली सिडक एन.एच-44 पर सुरक्षा बवस्था निग्गर करी दिती गई ऐ। कुसै बी माड़ी घटना गी रोकने लेई बाद्दू सुरक्षाबलें दी तैनाती कीती गई ऐ- जांच नाक्के स्थापित कीते गेन ते गड्डियें दी बवस्थित आओ-जाई लेई सुरक्षाबलें दी गश्त बी बधाई दिती गई ऐ। इस सरबंधै च होर जानकारी दिंदे होई उधमपुर दे एस.एस.पी अमोद अशोक नागपुरे होरें आखेया.

गणतंत्र दिवस दा मुख समारोह जम्मू दे मौलाना आज़ाद स्टेडियम च होग- जित्थे लैफ्टिनेंट गवर्नर मनोज सिन्हा होर परेड दी सलामी लैगंन। मुखमंत्री उमर अब्दुल्ला बतौर मुख परौहने इस कार्यक्रम च हिस्सा लैगंन।

<><><><><><>

National Sports Conf.

जम्मू-कश्मीर आसेआ कल 17 ते अतरु 18 जनवरी गी जम्मू दे कन्वेंशन सेंटर प्रदेश दी पैहली-पैहली राश्ट्री स्तर दी खेड्ठ कांफ्रेंस दी मेजबानी कीती जाहग। युवा सेवाएं ते खेड्ठे सरबंधी निदेशालय आसेआ आयोजित कीते जाने आहले दऊं दिनें दे इस कार्यक्रम दा मकसद खेड्ठ ढांचे गी तगड़ा बनाना, युवाएं दी हिस्सेदारी गी बधाना ते 'खेलेगा भारत खिलेगा भारत'

जन्हेही राश्ट्री स्तर दिणं पैहलकदमिणं मूजब अपने प्रदेश गी अग्गे बधाना ऐ। इस सम्मेलन च खेड्ड प्रशासक, नीतियां बनाने आले, कोच ते खड्डारी बी कौशल विकास, भलेआं हेठली सतह पर खेड्ड सुविधाणं दे बाद्दे विस्तार ते खेड्डें सरबन्धी टिकाऊ मंचें जन्हेह विशें पर बचार सांझे करडन। युवा सेवाणं ते खेड्डें सरबन्धी विभाग दिणं डरैक्टर जनरल अनुराधा गुप्ता हौरें आखेआ ऐ जे इस सम्मेलन दा आयोजन एह दर्शादा ऐ जे जम्मू-कश्मीर, खेड्डें दे इक गढ दे तौर पर उभरियै सामने आवा'रदा ऐ।

<><><><><><>

Start Up India

स्टार्टअप इंडिया आली पैहलकदमी दा अज्ज इक दहाका पूरा होई गया ऐ। इसी बरे 2016 च शुरु कीता गया हा ते एदा मकसद नमियें काड्डें- उद्यम कारखानादारी ते रास पूंजी आसेया संचालित विकास गी बढ़ावा देना ऐ। एह पैहलकदमी दुनिया दे सब्बनें शा बड्डे ते सब्बनें शा मते बन्न-सबन्ने स्टार्ट अप तंत्रें चा इक बनी गेदी ऐ। पिच्छले 10एं बरे दे दौरान स्टार्ट अप इंडिया नै नमियें काहड्डे आहलियें प्रवृत्तियें गी बढ़ावा देने- कम्मरोजगार दे मौकें पैदा करने ते आर्थिक विकास यकीनी बनाने च महत्वै आली भूमिका निभाई ऐ ते 2047 तगर विकसित भारत दे निर्माण लेई टकोहदा योगदान बी दिता ऐ।

<><><><><><>

Weather

मौसम विभाग नै अज्जै थमां जम्मू-कश्मीर च बरखा ते बर्फबारी दी भविक्खवाणी कीती ऐ।
मौसम विभाग मूजब- प्रदेश दिये केंड्ये थाहरे पर अज्ज मौसम बदलोखड़ा बने दा रौहग ते
हौली बरखा ते बर्फबारी दे बी असार न। जम्मू खिते दे पदरे इलाके च अगले दंऊ दिने दे दरान
दर्मयाने दर्जे थमां घनी धुंध पेई सकदी ऐ। औंदी 23 ते 24 जनवरी चिनाब घाटी दे हिस्से सने
उधमपुर- रियासी ते दक्खनी कश्मीर च बी दर्मयाने थमां भारी दर्जे दी बरखा बरने दी
भविक्खवाणी बी कीती गई ऐ। लोके गी सलाह दिती गई ऐ जे ओह खासतौरा पर 23 ते 24
जनवरी लेई बड़ा सोची-बचारिये यात्रा सरबन्धी योजना त्यार करन ते मती जानकारी लेई मौसम
विभाग दिये सूचनाएं गी दिक्खदे रौहन।

<><><><><><>